

Porfin organizacion SMAC a haci entrega di premionan di Carnaval 65



ORANJESTAD (AAN): Diasabra anochi na Carnival Euphoria Exhibition, a tuma lugar e entrega di premio di esnan cu a gana y sobresali den Carnaval 65.

Recien tabatin hopi hende ta puntra di con Augustus ta finalizando, y ainda e organizacion SMAC no a haci entrega di e premionan.

Porfin riba e ultimo anochi di Augustus, a haci entrega di e premionan.

E anochi aki, Shannon Henriquez a duna su ultimo discurso como president di SMAC.

Henriquez a mustra, cu ta cu hopi placer nan ta entrega premio na tur e carnavalistanan cu a resalta den Carnaval 65. Sin nan creatividad, nos hendennan no por a gosa di un carnaval 65 impresionante.

Segun Henriquez, nan ta na antelala di hopi noticia interesante relaciona cu desarrollo di e organizacion cu ta pasando den un etapa pa por haya un persona pa ocupa e presidencia di SMAC, di cual lo trece cune miembronan nobo, motiva, inspira pa sigui cu e trabao cu nos directiva cu tabata na mi encargo pa 3 aña.

Aki Shannon Henriquez a indica cu e tin tur confianza cu e siguiente president lo sigui e trabao cu nan a bin ta haci pa e ultimo añanan.

Un trabao voluntario cu

no tabata facil, nan mester a para duro band'i otro pa ehecuta e plan cu nan tabata tin y pensamentonan di tur esnan cu ta forma parti den un forma directo y indirecto di e organizacion.

Carnaval ta rancu sali oficialmente riba Dialuna 11 di November 2019, y cu SMAC nan a mira un apertura di carnaval cu a bira grandi den un forma unico, un idea cu a inspira Kevin James cu nos pueblo carnavalesco a brasa.

Shannon Henriquez ta manda un danki nan tur esnan cu a sostene e directiva aki, tur e voluntario, patrocinador-, y organizacionan. Tabata un honor di por a traha pa carnaval como president di SMAC, posicion cu semper lo tin un lugar bon warda den mi curazon.

Henriquez a finaliza bisando: "Na e president nobo y miembronan nobo, hopi exito, hopi forsa, hopi pasenshi tolerancia, hende facilmente lo por critica pero pa haya voluntario pa yuda ta poco, pesey nos tin un aprecio na tur esnan cu a entrega na tempo, idea pa nos por celebra e manifestacion cultural di mas grandi riba nos isla cu ta Carnaval. Manera Don Milo Croes a yega di bisa Carnaval di Aruba si ta Carnaval. Biba Carnaval, Biba SMAC, Biba Aruba!"